

30. april 2010

UPA 2010/102

**Uunga siunnersuut: Kalaallit Nunaanni annaassiniarnissamut
upalungaarsimaneq aamma ikuallattoornissamik qaartoornissamillu
pitsaaliuinermi iliuusissat pillugit Inatsisartut inatsisaat**

(Ineqarnermut, Attaveqarnermut Angallannermullu Naalakkersuisoq)

pillugu

Attaveqarnermut Ineqarnermullu Ataatsimiititaliap

ISUMALIUTISSIISSUTAA

Inatsisissatut siunnersuutip aappassaaneerpeqarnerani saqqummiunneqartoq

Ataatsimiititaliaq kingullermik suliarinninnermini ukuninnga inuttaqarpoq:

Inatsisartunut ilaasortaq Justus Hansen, Demokraatit, siulittaasoq
Inatsisartunut ilaasortaq Olga P. Berthelsen, Inuit Ataqtigiit, siulittaasup tullia
Inatsisartunut ilaasortaq Debora Kleist, Inuit Ataqtigiit
Inatsisartunut ilaasortaq Kim Kielsen, Siumut
Inatsisartunut ilaasortaq Akitsinnguaq Olsen, Siumut

Siullermeerinerup kingorna ataatsimiititaliap siunnersuut erseqqinnerusumik
naliliiffigaa imalu oqaaseqaateqassalluni:

Siunnersuutip tunngavigisaa imarisaalu

Inatsisissatut siunnersuutip kingunerisaanik ikuallattoornissamut inatsit maanna
atuuttoq Kalaallit Nunaanni annaassiniarnissamut upalungaarsimaneq aamma
ikuallattoornissamik qaartoornissamillu pitsaaliuinermi iliuusissat pillugit
inatsimmik nutaamik taarserneqassaaq.

Upalungaarsimanermut tunngasuni maleruaqqusanik ullutsinnut naleqqunnerusunik pisariaqartitsinerup aaqqiivigineqarnissaa, tassami inuiaqatigiinni ineriartornerup kingunerisaanik upalungaarsimanissamut piumasqaatit annertusiartuinnarmata, ilaatigullu suliaassat upalungaarsimanermik suliaqartut tigujartuaagaat inatsimmi atuuttumi ersersinneqanngitsut ilanngunneqarnissaat siunnersuummi ilaatigut pingaarnertut anguniarneqarpoq.

Tusarniaaneq

Tusarniaanermi akissutit tiguneqartut attuumassuteqartut siunnersuummut nassuiaatini ilanngunneqarsimasut ataatsimiititaliamit maluginiarneqarpoq.

Isumasioqatigiilluni ataatsimiinneq

Ataatsimiititaliap siunnersuummik suliaqaqqinnissaanut atatillugu pissutsit arlallit qulaajarneqarnissaat siullermeerinermi kissaatigineqarpoq. Taamaattumik suliaasaqarfimmi Naalakkersuisunut ilaasortaqaq ataatsimiititaliap isumasioqatigalugu ataatsimeeqatigaa.

Siunnersuutip tusarniaassutigineqarneranut, siunnersuutip aningaasaqarnikkut kingunerisassaanut, qatserisartut annaassiniartartullu nuna tamakkerlugu upalungaarsimanermut ataatsimiititaliarsuarmi ilaasortaataitaqarnerat pillugu Naalakkersuisut isumaannut, qatserisartut ilinniartitaanerup annaassiniartartut ilinniartitaanermik tapertalerneqarnissaanut kiisalu siunnersuutip aappasaaneerneqarnissaata ukiakkut ataatsimiinnermut kinguartinneqarnissaanut periarfissamut pingaartut attuumassutilinnik Ataatsimiititaliaq Naalakkersuisunut ilaasortamut arlalinnik apeqquteqarpoq. Ataatsimiititaliap apeqqutai Naalakkersuisullu akissutaat isumaliutissiissummut matumunnga ilanngunneqarput.

Siunnersuutip suliarineqarnera

Siunnersuut siullermeerneqarmat siunnersuut ataatsimut isigalugu pitsaasut isigineqartoq ataatsimiititaliap maluginiarpaa. Taamaattumik isumasioqatigiilluni ataatsimeeqateqarnermi Naalakkersuisunut apeqqutigisamini ataatsimiititaliap apeqqutit siuliani taaneqartut kisiisa aalluppai. Naalakkersuisut akissutaat ataatsimiititaliap tusaatissatut tiguai, tamatumali peqatigisaanik allanik apeqquteqarnissaminut periarfissinneqarluni.

Tamanna pillugu apeqqummut atatillugu suliaasaqarfimmi Naalakkersuisunut ilaasortaqaq akissuteqarpoq ikuallattoornissamut upalungaarsimanissamullu atortut pillugit minnerpaaffigitassanik Naalakkersuisut kommunitut piumasqaateqanngitsut. Tamanna kommunit kisimik akisussaaffigigaat aammalu suliaasaqarfimmi tamatumani Naalakkersuisut kommunitut nakkutilliisuunngitsut aamma erseqqissaatigineqarpoq. Najukkani pissutsit annertuumik assigiinngissuseqarnerat pissutigalugu atortunut atatillugu minnerpaaffigitassanik

piumasaqaateqarnissaq naapertuutinngitsoq Naalakkersuisut isumaqarput. Ataatsimiititaliarli paarlattuanik isumaqarpoq, taakkorpiaat pineqartut tunngavigalugit upalungaarsimanissamut minnerpaaffigitassanik piumasaqaateqarnissaq pisariaqartoq.

Sakkunik assartuutinillu inuinnarnit pigineqartunik annaassiniarnissamut upalungaarsimasut atugassinneqarnissamik siunnersuummi § 15-imi aalajangersagaq malillugu piumasaqaateqarsinnaanerisa saniatigut illutanik atugassinneqarsinnaanerup ilanngunneqarnissaa pillugu kissaateqarnermut atatillugu inatsisip oqaasertaasa taamatut ilaneqarnissaat pisariaqanngitsoq Naalakkersuisunut ilaasortaq isumaqarpoq.

Aningaasaqarnikkut tunngavissanik tamakkiisumik qulaajarneqanngitsunik siunnersuut una imaqartoq, taamaattumillu siunnersuut 2010-mi ukiakkut ataatsimiinnermi aappassaaneernejartariaqartoq ataatsimiititaliami ikinnerussutillit aalajangiusimavaat. Akerlianik aningaasaqarnikkut tunngavissat tamakkiisumik qulaajarneqarsimannginnerarlugit oqarnermut Naalakkersuisunut ilaasortap isumaqataannginninni aalajangiusimavaa.

Siuliani apequteqaqqinnermi sammineqartut nalinginnaasumik tapersersorneqarput, tamannali siunnersuuttip matumani pineqartup akuersissutigineqarnissaata kinguartinneqarnissaanik kinguneqarani. Sammineqartulli taakku inatsisip allanngortinneqarnissaanik siunnersuutikkut ukiakkut ataatsimiinnermi saqqummiunneqarsinnaanerit ataatsimiititaliamit kaammattuutiginarneqarlunilu tapersersornartinneqarpoq. Tassani pineqarput atortut il.il. pillugit minnerpaaffigitassanik piumasaqaateqartoqarnissaanik kissaat, suliaasaqarfimmi Namminersorlutik Oqartussat kommuninik nakkutilliinissaasa pisariaqarnera kiisalu illutat § 15-imi aalajangersakkamut ilanngunniarneqarnerat.

Tamanna tunngavigalugu siunnersuut Inatsisartunit akuersissutigineqassasooq Ataatsimiititaliap isumaqatigiittup inassutigaa.

Taama oqaaseqarluni Attaveqatigiinnermut Ineqarnermullu Ataatsimiititaliap siunnersuut Inatsisartunut aappassaaniigassanngortippaa.

Justus Hansen,
Siulittaasoq
Demokraatit

Olga P. Berthelsen,
Siulittaasup tullia
Inuit Ataqtigiit

Debora Kleist
Inuit Ataqtigiit

Kim Kielsen,
Siumut

Akitsinguaq Olsen,
Siumut

[Ilanngussaq 1](#)

[Ilanngussaq 2](#)